



OCC MENYERU PENGUKUHAN PELAKSANAAN, KEUPAYAAN INSTITUSI DAN
PENERUSAN REFORMASI SUSULAN “SIMPOSIUM REFORMASI PERUNDANGAN HAK
KANAK-KANAK” YANG DIADAKAN PADA 8-9 JUN 2026

KUALA LUMPUR (9 JUN 2026) - Pejabat Pesuruhjaya Kanak-kanak (OCC) Suruhanjaya Hak Asasi Manusia Malaysia (SUHAKAM) mengucapkan tahniah atas kejayaan penganjuran Simposium Reformasi Perundangan Hak Kanak-kanak dan merakamkan penghargaan terhadap komitmen yang ditunjukkan oleh penggubal dasar, ahli-ahli Parlimen, agensi kerajaan, pertubuhan masyarakat sivil, ahli akademik dan pendukung hak kanak-kanak dalam memajukan perbincangan bagi memperkukuh ekosistem perlindungan kanak-kanak di Malaysia. Simposium ini telah menyediakan platform penting untuk menilai kemajuan Malaysia dalam melaksanakan obligasinya di bawah Konvensyen Mengenai Hak Kanak-kanak (CRC), mengenal pasti jurang berterusan dalam undang-undang, dasar dan pelaksanaan, serta meneroka reformasi yang diperlukan bagi memastikan setiap kanak-kanak menikmati hak mereka tanpa diskriminasi dan selaras dengan prinsip kepentingan terbaik kanak-kanak.

Sebagai mekanisme bebas yang diberi mandat untuk mempromosi dan melindungi hak kanak-kanak di Malaysia, OCC memantau pelaksanaan hak kanak-kanak, menerima aduan berhubung pelanggaran hak tersebut, serta menggesa pelaksanaan undang-undang, dasar dan amalan yang melindungi serta memelihara hak dan kepentingan terbaik setiap kanak-kanak. Perbincangan yang berlangsung sepanjang simposium ini turut memperlihatkan bahawa usaha memperkukuh dan memajukan hak kanak-kanak tidak boleh bergantung semata-mata kepada kerangka perundangan yang mantap, sebaliknya perlu disokong oleh pelaksanaan yang berkesan, peruntukan sumber yang mencukupi serta kerjasama institusi yang menyeluruh dan bersepadu.

Malaysia telah menjadi Negara Pihak kepada CRC selama lebih daripada tiga dekad. Sepanjang tempoh tersebut, Malaysia telah melaksanakan usaha penting untuk memperkukuh perlindungan kanak-kanak melalui pindaan perundangan, pembangunan dasar dan penubuhan pelbagai mekanisme perlindungan kanak-kanak. Perkembangan ini mencerminkan komitmen berterusan Malaysia ke arah membina sistem yang lebih kukuh untuk kanak-kanak. Walau bagaimanapun, fasa seterusnya dalam kemajuan hak kanak-kanak memerlukan peralihan daripada sekadar kewujudan undang-undang kepada usaha untuk memastikan pelaksanaan secara bermakna. Walau sebaik mana sekalipun sesuatu kerangka perundangan digubal, keberkesanannya hanya dapat dicapai sekiranya institusi yang bertanggungjawab melindungi kanak-kanak mempunyai sumber yang mencukupi, tenaga kerja yang kompeten, pembiayaan yang mampan serta kapasiti operasi yang kukuh untuk melaksanakan perlindungan tersebut secara berkesan.

OCC mengambil maklum bahawa banyak cabaran kontemporari yang menjejaskan kanak-kanak, bukan sahaja berpunca daripada jurang perundangan, tetapi juga daripada halangan pelaksanaan yang bersifat sistemik. Ini termasuk cabaran berkaitan penyelarasan antara agensi, ketersediaan perkhidmatan khusus, kekangan sumber manusia dalam kalangan petugas barisan hadapan perlindungan kanak-kanak, mekanisme pengumpulan data dan pemantauan, serta keupayaan untuk menterjemahkan dasar kepada intervensi yang tepat pada masanya dan berkesan untuk kanak-kanak. Oleh itu, mekanisme sedia ada yang ditubuhkan di bawah Akta Kanak-kanak 2001 dan kerangka berkaitan perlu terus diperkukuh bagi memastikan perlindungan yang digariskan oleh undang-undang dapat direalisasikan sepenuhnya. Sistem perlindungan kanak-kanak hanya berkesan sekiranya ia mampu mencapai dan melindungi kanak-kanak pada saat perlindungan diperlukan. Hal ini memerlukan pelaburan berterusan dalam perkhidmatan sosial, pemerkasaan dan profesionalisasi tenaga kerja perlindungan kanak-kanak, penggubalan dasar berasaskan bukti serta penyelarasan yang lebih kukuh antara institusi berkaitan.

OCC turut mengiktiraf bahawa pelaksanaan hak kanak-kanak memerlukan penglibatan bermakna dengan konteks sosial, budaya dan komuniti di Malaysia. Keseragaman penerapan hak kanak-kanak di bawah CRC diperkukuh apabila ia dilaksanakan melalui pendekatan yang mengambil kira realiti setempat, di samping memelihara nilai asas bersama iaitu maruah, perlindungan, tanpa diskriminasi, penyertaan dan kepentingan terbaik kanak-kanak. Dialog konstruktif yang melibatkan penggubal dasar, komuniti, pemimpin agama, pertubuhan masyarakat sivil, keluarga dan kanak-kanak sendiri kekal penting bagi memastikan reformasi yang dilaksanakan berteraskan prinsip serta mampan dari aspek praktikal.



**KENYATAAN MEDIA
PEJABAT PESURUHJAYA KANAK-KANAK SURUHANJAYA HAK
ASASI MANUSIA MALAYSIA (SUHAKAM)**

Simposium ini juga menyoroti beberapa isu hak kanak-kanak yang masih menjadi cabaran berterusan dan memerlukan komitmen serta tindakan bersepadu daripada semua pihak. Antaranya termasuk memastikan akses kepada perlindungan bagi kanak-kanak rentan, memperkukuh sistem keadilan yang mesra kanak-kanak, melindungi kesihatan dan kesejahteraan kanak-kanak, serta menjamin bahawa setiap kanak-kanak bebas daripada keganasan, pengabaian, eksploitasi dan peminggiran. Isu-isu ini telah dibangkitkan secara konsisten oleh Jawatankuasa Pertubuhan Bangsa-Bangsa Bersatu Mengenai Hak Kanak-kanak, SUHAKAM, OCC, pertubuhan masyarakat sivil dan pembela hak kanak-kanak. Simposium ini telah menyediakan peluang penting untuk menegaskan semula keperluan terhadap pendekatan seluruh masyarakat dalam memperkukuh ekosistem perlindungan kanak-kanak di Malaysia.

Melangkah ke hadapan, OCC bersedia untuk menyokong Ahli-ahli Parlimen, agensi kerajaan dan pihak berkepentingan melalui syor berasaskan bukti, pemantauan, penyelidikan serta libat urus dengan kanak-kanak dan komuniti. Memastikan suara kanak-kanak didengar dan dipertimbangkan dalam proses membuat keputusan kekal sebagai teras kepada pembinaan dasar yang memberi respons secara berkesan terhadap realiti kehidupan mereka. OCC menegaskan bahawa kemajuan Malaysia dalam memperkukuh hak kanak-kanak tidak boleh terhenti pada komitmen dan perancangan semata-mata, tetapi perlu diterjemahkan kepada tindakan yang nyata dan memberi impak kepada kehidupan kanak-kanak. Bagi mencapai matlamat ini, keupayaan pelaksanaan perlu diperkukuh, sumber yang mencukupi perlu disediakan dan halangan yang menjejaskan keberkesanan sistem perlindungan kanak-kanak perlu ditangani. Langkah-langkah ini penting bagi memastikan Malaysia dapat memenuhi tanggungjawabnya di bawah Konvensyen Mengenai Hak Kanak-Kanak (CRC) serta menjamin setiap kanak-kanak membesar dalam persekitaran yang menghormati maruah, hak dan potensi mereka.

OCC berharap agar syor dan pandangan yang diketengahkan sepanjang simposium ini dapat menjadi pemangkin kepada komitmen nasional yang lebih kukuh dalam memajukan hak kanak-kanak. OCC juga berharap usaha ini akan menyumbang kepada pembinaan sistem perlindungan kanak-kanak yang lebih mampan, inklusif dan berkesan demi kesejahteraan semua kanak-kanak di Malaysia.

-TAMAT-

**Pejabat Pesuruhjaya Kanak-Kanak
Suruhanjaya Hak Asasi Manusia Malaysia (SUHAKAM)
9 Jun 2026**